

28/03/2004

Azalina terharu kepercayaan Pak Lah

KUALA LUMPUR: "Saya fikir dilantik sebagai Setiausaha Parlimen saja, rupanya saya dilantik sebagai menteri penuh. Saya sungguh terharu di atas kepercayaan yang diberikan Pak Lah dan berikrar akan memikul amanah ini sebaik mungkin, Insya-Allah".

Begitulah reaksi Ketua Puteri Umno, Datuk Azalina Othman Said, sebaik diminta mengulas pelantikannya sebagai Menteri Belia dan Sukan yang baru.

Beliau yang berada di Pengerang ketika pengumuman itu dibuat mengakui terkejut mendengar pengumuman Datuk Seri Abdullah Ahmad Badawi mengenai pelantikannya sebagai menteri penuh.

"Saya anggap ini satu penghormatan dan pengiktirafan kepada Pergerakan Puteri Umno secara keseluruhan," katanya.

Beliau berada di Pengerang sejak kelmarin untuk menghadiri program di kawasan parlimen yang dimenangnya tanpa bertanding pada pilihan raya umum ke-11 yang lalu.

Azalina turut berterima kasih kepada semua pemimpin Umno, Pemuda, Wanita dan ahli Majlis Tertinggi yang selama ini memberi sokongan padu kepada beliau dan Puteri Umno.

"Banyak terima kasih kepada Tun Dr Mahathir Mohamad kerana yakin dengan pengwujudan Puteri dan memberi kepercayaan kepada saya menerajui Puteri pada era penaja," katanya.

Dengan pelantikan itu katanya, beliau akan memastikan kementerian yang akan diterajunya kelak mencapai visi Pak Lah untuk menjadikan Malaysia sebuah negara yang cemerlang, gemilang dan terbilang.

Azalina berkata, beliau juga akan mendapatkan nasihat dan tunjuk ajar daripada Datuk Hishamuddin Hussein, yang menerajui kementerian itu sebelum ini, selain mendengar taklimat daripada pegawai di kementerian itu.

Secara keseluruhan beliau menganggap kabinet baru yang diumumkan semalam sebagai gandingan muka lama dan baru, membabitkan golongan profesional.

"Saya melihat penyusunan semula kabinet oleh Pak Lah sebagai amat menarik dan lebih khusus untuk memastikan kelancaran pentadbiran negara dalam menuju era cemerlang, gemilang dan terbilang," katanya.

Pembabitan aktif Azalina dalam arena politik tanah air bermula apabila dilantik menjadi ahli MT Umno pada 2000 sebelum menjadi Ketua Penaja Puteri Umno pada April 2001.

Pada 1 November 2002, pemegang sarjana undang-undang dari London School of Economics itu dipilih sebagai Ketua Puteri Umno, sekali gus menjadikannya seorang daripada enam Naib Presiden Umno.

Selain itu, Azalina yang juga Naib Ketua Penaja Umno Bahagian Pengerang, menjadi penasihat dalam beberapa pertubuhan kerajaan dan bukan kerajaan (NGO), termasuk Jabatan Hal Ehwal Wanita (Hawa), Persatuan Peguam Muslim, Persatuan Pergerakan Wanita (Awam), Pertubuhan Pertolongan Wanita (WAO) dan Yayasan Pembangunan Wanita.

Beliau juga adalah pengasas Yayasan Sukan dan Kecergasan Wanita Malaysia pada 1995 dan dilantik sebagai Presiden pertubuhan terbabit sejak Oktober 2000.